

आकाशवाणी जयपुर-अजमेर
प्रादेशिक समाचार
दिनांक 08.09.2024 समय: 18.45 बजे

- प्रदेश रा न्यारा न्यारा हलकां मांय मॉनसूनी बिरखा रो दौर जारी-कुछेक ठोड़ां माथे भारी बिरखा सूं जनजीवन प्रभावित।
- मुख्यमंत्री भजन लाल शर्मा दक्षिण कोरिया अर जापान री यात्रा माथे रवाना-राईजिंग राजस्थान इनवेस्टर्स समीट मांय निवेशकां ने करेला आमंत्रित।
- अंतर्राष्ट्रीय साक्षरता दिवस माथे आज केई कार्यक्रम राखी ज्या-ऋषि पंचमी अर गणेश उत्सव रा भी व्ह्या आयोजन।
- पेरिस पैरालंपिक खेलां रो आज व्हेला रंगारंग समापन-भारत सात सोने रे तमगा साथे अंकतालिका मांय 16वीं जगह माथे।

000

सितंबर म्हीने रो पेलो सप्ताह बीत जावण रे पाछे भी प्रदेश मांय मॉनसून आपरी पूरी रंगत मांय है। लारला 24 घंटां रे चालता राज्य मांय कुछेक ठोड़ां मांय भारी बिरखा रे कारणे जनजीवन माथे घणो असर पड्यो है। मौसम महकमे रे मुजब अलवर, भरतपुर, करौली, सिरोही, झालावाड़, बूंदी अर टोंक जिलां मांय कठे-कठे भारी बिरखा दरज करीजी है। इण रे चालता पूर्वी राजस्थान मांय सब सूं बत्ती बिरखा अलवर जिले रा कठूमर मांय 11 सेंटीमीटर दरज हुई। इणी तरह पश्चिमी राजस्थान रा सोजत मांय चार सेंटीमीटर बारिश दरज हुई। महकमो अजमेर, जोधपुर, भीलवाड़ा, नागौर, पाली, चित्तोडगढ़ अर दक्षिणी जिलां मांय कुछेक ठोड़ां माथे मध्यम सूं तेज बिरखा अर कठे-कठे भारी बारिश होणे री चेतावनी दी है। इणी तरह जयपुर, अलवर अर पूर्वी जिलां रे साथे-साथे शेखावाटी खेतर रा जिलां अर उदयपुर संभाग रा कुछेक जगावां मांय हल्की सूं मध्यम बिरखा होवण री आस है। इण बीच राजधानी जयपुर मांय दो दिन सूं चाल रियो बरसात रो दौर आज भी बण्योडो है। इण दौरान जिलाभर मांय रूक-रूक कर बरसात हो री है। अजमेर मांय आज भी बिरखा होणे सूं आमजन घणो प्रभावित हुआ। वठी ने सुंवारे धूप खिलणे रे साथे दुपहरां पाछे ओजू बरसात रो सिलसिलो सरू हुआ। पडौसी जिले केकड़ी मांय भी जारी रिमझिम बरसात सूं नदी-नाळां मांय पाणी री आवक बध गयी है। म्हाणा खबरनवीसा बतायो कि जिला मांय लगेतार हो री भारी बरसात सूं डाई नदी उफाण माथे है, जिण सूं लसाडिया बांध री चादर तेजी सूं बह री है। वठी ने पाली मांय भी लगेतार बिरखा सूं केई नदी नाळा उफाण माथे आ गया है। जिले रो समंद बांध दशकां पाछे ओवरफ्लो व्हे गयो। जिला प्रशासन सावचेती राखता व्ह्या लोगां सूं पाणी रा बहाव खेतर सूं दूर रहणे री अरज करी है। हाड़ौती मांय भी लारला कुछ दिनां सूं जारी बरसात सूं कोटा बैराज रो पाणी रो स्तर बध गयो है। आज बैराज रा दो गेट खोलर सात हजार क्यूसेक पाणी री निकासी करीजी। इण बार रेगिस्तानी जिलां मांय भी चोखी बिरखा रो सिलसिलो बण्योडो है। बालोतरा जिला मांय आज फेरू हुई मूसलाधार बरसात सूं निचले हलकां मांय पाणी भर गयो। वठी ने कल्याणपुर, पचपदरा, पाटोदी अर गिड़ मांय जमर मेह बरस्यो।

000

राईजिंग राजस्थान इनवेस्टर्स मीट मांय निवेशकां ने न्योतो देवण खातिर मुख्यमंत्री भजन लाल शर्मा आज दक्षिण कोरिया अर जापान री यात्रा खातिर रवाना व्ह्या। प्रदेश मांय औद्योगिक निवेश बधाणे अर उद्योगां ने नुवी गति देणे रे लगस सूं दिसंबर मांय होवण वाळी इण अन्तर्राष्ट्रीय इनवेस्टर्स मीट सूं पेलो 09 सूं 14 सितंबर ताई आं दोन्यू देशां मांय प्री-इनवेस्टर्स मीट राखी जावेली। मुख्यमंत्री रा नेतृत्व मांय राज्य सरकार रो प्रतिनिधि मण्डल आं दोन्यू देशां रा उद्यमियां ने राजस्थान मांय निवेश खातिर आमंत्रित करेला अर राज्य सरकार री निवेश सहूलियतां अर

योजनावां ने उद्यमियां सूं साझा करेला। मुख्यमंत्री ने जयपुर एयरपोर्ट माथे रवाना होणे सूं पेलां राज्य सरकार रा मंत्री, मुख्य सचिव अर आला अधिकारी शुभकामनावां दी।

000

जोधपुर मण्डल रा डेगाना-रतनगढ़ रेलखण्ड माथे इलेक्ट्रिक रेल रो संचालन सरू व्हे ग्यो है। इण रेल मारग माथे आज बान्द्रा-जम्मूतवी, विवेक एक्सप्रेस ने चलायो ग्यो। मण्डल रेल प्रबन्धक पंकज कुमार सिंह बतायो कि 150 किलोमीटर लम्बा इण रेला मारग रे गेले, अबे बेगी ही दिल्ली ताई इलेक्ट्रिक रेल चलायी जा सकेली। वणा बतायो कि जोधपुर मण्डल माथे संपूर्ण विद्युतिकरण रो काम लगेटगे पूरो व्हे ग्यो है। जोधपुर मारवाड जंक्शन, जोधपुर-बीकानेर अर लूणी-भिलड़ी रेल मारगां माथे भी इलेक्ट्रिक रेल सेवा चालू करी जा री है।

000

अन्तर्राष्ट्रीय साक्षरता दिवस रे मौके माथे आज प्रदेशभर मांय केई कार्यक्रम राख्या ग्या। साक्षरता दिवस रे इण बरस रो विषय-बहुभाषी शिक्षा संवर्धन : आपसी समझ और शांति के लिए साक्षरता राख्यो गयो। इण मौके माथे नुवी दिल्ली मांय राख्यी ज्या कार्यक्रम मांय उपराष्ट्रपति जगदीप धनखड़ कयो कि राष्ट्रीय शिक्षा नीति एक बड़ो परिवर्तनकारी कदम है। श्री धनखड़ कयो कि ओ युवावां ने आपरी प्रतिभा अर ऊर्जा रो पूरो उपयोग करणे रा मौका प्रदान करे है। वणा कयो कि भाषावां री समृद्धि रे मामले मांय भारत एक अनूठो देश है। उपराष्ट्रपति कयो कि राष्ट्रीय शिक्षा नीति मांय मायडभाषा रे महत्व माथे जोर दियो गयो है। श्री धनखड़ सगळा सूं कम सूं कम एक जणे ने साक्षर बणाणे रो संकल्प लेणे री अरज करी। अन्तर्राष्ट्रीय साक्षरता दिवस रे मौके माथे प्रदेश भर मांय भी केई जागरूकता कार्यक्रम आयोजित किये गये। इण सिलसिला मांय श्रीगंगानगर रा केन्द्रीय कारागृह मांय सगळा खातिर शिक्षा कार्यक्रम राख्यो गयो। जिला साक्षरता अर सतत शिक्षा अहलकार पन्नालाल कडेला बतायो कि कार्यक्रम मांय बंदियां ने कानूनी जानकारी दी अर वां ने स्वरोजगार सूं जोड़ने खातिर प्रेरित करयो गयो। इण रे चालता गत परीक्षा मांय मौजूद बंदियां ने प्रमाण-पत्र बांट्या ग्या। बाड़मेर रा राजकीय उच्च माध्यमिक विद्यालय मांय विचार गोष्ठी अर प्रतिभा सम्मान जळसो राख्यो गयो। हनुमानगढ़ मांय महिला अर बाल विकास महकमा री कानी सूं राख्या ग्या कार्यक्रम मांय टाबर नृत्य वाटिका पेश कर र पढाई री उपयोगिता समझाई। इणी तरह डूंगरपुर जिला मुख्यालय माथे राख्यी ज्या कार्यक्रम मांय घणी तादाद मांय नव साक्षर भेळा व्ह्या। इण रे चालता न्यारी-न्यारी होडां रा विजेतावां ने पुरस्कृत कर्यो गयो।

000

प्रदेश रा केई ठोडां मांय आज न्यारा न्यारा समाज री कानी सूं ऋषि पंचमी रो परब धार्मिक उच्छास रे साथे मनायो गयो। इण मौके माथे बहणां भाईयां री कलाइयां माथे रक्षा सूत्र बांध्या। टोंक अर सवाईमाधोपुर मांय इण मौके माथे केई आयोजन व्ह्या। वठी ने आश्रम अर मठां मांय संत-महात्मावां ने भी रक्षा सूत्र बांध्या ग्या। जैसलमेर रा प्राचीन तीर्थ वैशाखी रे कृष्ण कुण्ड मांय सिरधालु पूजा-अर्चना करी अर डुबकी लगायी। पाली रा लाखोटिया सरोवर घाट माथे लोगां पितरां रो तर्पण करयो। आज सूं ही दिगम्बर जैन समाज रो दशलक्षण परब भी सरू व्हे ग्यो। पैलो दिन उत्तम क्षमा दिवस रे रूप मांय मनायो गयो। जैन मंदिरां अर जिनालयां मांय भगवान नेमीनाथ रो अभिषेक करयो गयो। दूजी कानी गणेश उच्छव रे दूजे दिन आज गणेश पाण्डाल मांय कार्यक्रम राख्या ग्या। जयपुर मांय परम्परागत रूप सूं भगवान गणेश री शोभा जातरा निकाली ज्यी।

000

धौलपुर मांय कोमी एकता रो प्रतीक मचकुण्ड धाम देवछठ मेळो आज सूं सरू व्ह्यो। तीन दिनां रे इण आयोजन मांय खास मेळो काल भरेला। मेळा मांय प्रदेश रा न्यारा न्यारा हलकां साथे पडौसी राज्य मध्यप्रदेश अर उत्तरप्रदेश सूं भी घणी तादाद मांय सिरधालु पहुंच रह्या है। मेळे मांय हिन्दू, मुस्लिम अर सिख समुदाय कानी सूं साझा रूप सूं कार्यक्रम राख्या जावे है। मेळे ने लेर जिला प्रशासन कानून व्यवस्था बनाया राखणे रा पुख्ता इन्तजाम कर्या है।

000

पेरिस पैरालिंपिक खेल आयोजन आज देर रात पूरा व्हे जावेला। भारत खातिर 2024 रा पैरालिंपिक खेल एक ऐतिहासिक मील रे पत्थर रे रूप मांय याद कर्यो जावेला। भारत सात सोने, नौ चांदी अर 13 कांसे समेत कुल 29 तमगा हासिल कर्या है अर पदक तालिका मांय 16वीं जगह माथे है। समापन जळसो फ्रांस रे नेशनल स्टेडियम मांय व्हेला। भारत री कानी सूं सोने रा तमगा जीतण वाळा तीरंदाज हरविंदर सिंह अर धावक प्रीति पाल ध्वजवाहक व्हेला। एथलीट परेड रे पाछे खेलां री मशाल 2028 मांय होवण वाळा आगले पैरालिंपिक खेलां रे मेजबान लॉस एंजिल्स ने सौंप दी जावेली। इण बीचे खेल मंत्री डॉक्टर मनसुख मांडविया कयो के भारत दो हजार तीस रा यूथ ओलंपिक अर 2036 रे ग्रीष्म कालीन ओलंपिक खेलां री मेजबानी खातिर दावो पेश करेला। आज नुवी दिल्ली मांय ऐशिया ओलंपिक परिसर री 44वीं महासभा ने सम्बोधित करता थकां वणा बतायो के लारला दस बरसां रे चालता मोदी सरकार कानी सूं देश रो खेल बजट 470 मीलियन डॉलर कर दियो गयो है ।

000

सरहदी जिला जैसलमेर मांय इण बार चोखी बरसात सूं सैलाणियां रे साथे प्रवासी पंछी भी खींच्या चला आ रिया है। कुरजा पंछिया जिले मांय केई ठोडां माथे अबार ऊं ई डेरो डाल दियो है। जिले रा देगराय-ओरण खेतर रे कने कुरजा पंछियां रो झुंड निजर आणे सूं पर्यावरण प्रेमियां मांय घणो उच्छास है।

.....

000

पुरुषां री एशियाई हॉकी चैम्पियनशिप होड आज चीन रा हुलुनबुइर मांय सरू व्ही। लारला दिनां पेरिस ओलंपिक मांय कांसे रो तमगो जतीणे रे पाछे गत विजेता भारत इण साल आपरो पांचवों खिताब जीतणे रो जतन करेला। आज भारत रो मुकाबलो मेजबान चीन सूं अर पाकिस्तान रो सामो मलेशिया सूं व्हेला। होड रो पैलो मैच दक्षिण कोरिया अर जापान रे बीच झों रयो।

000